



Sessione di l'Assemblea di Corsica
U 29 di maghju di u 2020
Discorsu di u Presidente*
Jean-Guy Talamoni

Care culleghe, cari culleghi,

Nanzu di principià vogliu rende un umaggiu à Albert Memmi, sparitu qualchì ghjornu fà. Era, a sapete, unu di i più grandi specialisti di i movimenti di sculunizazione. A Corsica, l'avia capita benissimu. I so scritti fermeranu una referenza per parechji. Ch'ellu risposi in pace.

Dipoi qualchì ghjornu, l'epidemia di Covid-19 in Corsica cala pianu pianu. Ùn c'hè più casi novi di malati, l'uspidali anu ritruvatu un ritimu più o menu nurmale è ripiglia a vita. Siamu attenti quantunque chì a crisa di u Covid-19 ùn hè daretu à noi. Ne sò tanti testimonni quelli chì sò sempri malati, indebbuliti assai, in l'uspidali o in casa è à i quali pensemu. Pensemu dinù a tutte e famiglie in dolu.

Ma pensu ch'ella hè vinuta l'ora di ringrazià, à nome di l'istituzione di a Corsica, tutti quelli chì anu permessu sta prima riescita, stu primu successu di fronte à a malatia.

Pensu di sicuru à tuttu u persunale medicale : medichi, infirmieri è tutti l'altri persunali di e strutture medicale. Tutti sti mistieri devenu esse rivalutati è d'un puntu di vista cuncretu, a crescita di e so paghe ùn serà chè ghjustizia. Ringraziamu dunque tuttu stu persunale è l'assicuremu di u nostru sustegnu in e so dumande di ricunnuscenza.

Vogliu ringrazià dinù tutti quelli chì sò stati appena sminticati in stu periodu di crisa : i mistieri di l'aiutu à e persone. Ste donne anu curatu, anu pigliatu risichi per aiutà à l'altri, particularmente i nostri anziani.

Di modu generale, ci vulerà à rivalurizà ancu tutti sti mistieri chì rilevanu di u settore privatu ma chì, di fattu, custituiscenu una missione di serviziu publicu. Per contu nostru, seremu à fianc' à l'agenti chì anu assicuratu è chì assicuranu sempre ogni ghjornu sta missione.

L'aghju digià fatta u 24 d'aprile ma vogliu ripete i nostri ringraziamenti à tutti quelli chì anu permessu à a sucetà di cuntinuà à campà : cascaghje, fattori, trasportatori, agricoltori è piscadori, insignanti, artigiani...

Ci vole à ringrazià dinù l'inseme di i Corsi : rispettendu e misure di cunfinamentu è di distanza fisica anu permessu i risultati pusitivi chè no cunniscimu oghje. Anu permessu di vince sta prima battaglia contr'à u Covid-19 è li facciu cunfidenza per cuntinuà à esse primurosi è rispunsevuli.

Infine, aiutendu u so vicinu, participendu finanziariamente, cum'è per via di u fondu Corsica solidaria o d'altri, fabbrichendu maschere, imprestendu u so alloghjju, cumprendu roba nustrale ecc, ecc, i Corsi anu messu in ballu una solidarità senza paru.

I vogliu incurasgisce à cuntinuà à aiutà tutti quelli chì ne anu bisognu è à sceglie, in a so cunsumazione, u cummerciu lucale è a roba casana.

Allora, dopu à i necessari ringraziamenti, appughjendu ci nant' à stu zocculu sodu di a solidarità, mi pare ch'elle hè dinù venuta l'ora di a riflessione per l'organizzazione di una sucetà nova.

Per contu nostru, deve esse cuncipita sta crisa cum'è una chjama à piglià cuscenza di l'urgenza di cambià u nostru modu di campà. Podassi, ci ne seranu d'altre, crise ? Pensu di sicuru à quelle liate à u riscaldamentu climaticu per indettu. Ma, piuttosto chè di teme le è d'aspettà le senza agisce, consideremu sta crisa di u Covid-19 cum'è l'opportunità di cambià ! Hè ora, per ogni settore, di fà un primu bilanciù di sta crisa è di ritene ne una sperienza : rivenutu universale, e-salute, teletravagliu, insegnamentu à distanza, ecc... Chì agricoltura per dumane è dopu dumane, chì scola, chì sistema di salute, chì occupazione di u spaziu, chì ecunomia ?

Sta riflessione, hè ora di purtà la, inseme.

Ci si pare ch'ella hè ghjunta l'ora d'appuntà l'avvene !

A ringrazià vi.

*Seul le prononcé fait foi

Contact presse : Julia Marchini– 06 03 66 94 80